

INUIT ATAQATIGIIT

Inatsisartuni



EM 2018/164
25.10.18.
Aqqaluaq B. Egede

**Naalackersuisut kingusinnerpaamik UKA2019-imut inatsisinik atuuttunik
allanngartitsinissaq pillugu siunnersuummik saqqummiussinissaat,
taamaaliornikkut eqqumiitsuliornermut aningaasaateqarfimmik
pilersitsinikkut eqqumiitsuliornermut aningaasaliissutinik tamanik
agguaassinermi attuumassuteqannginnissamik pilersitsinissaq
periarfissinneqarsinnaanissaat ilanngullugu Inatsisartuni
aalajangiiffigisassatut siunnersuut**

(Inatsisartunut ilaasortaq Peter Olsen, Inuit Ataqatigiit)

Inuiattut nunatsinni atugartuussutsikkut ineriartornerput kinaassusitsinnik "ingiallorteqarluni" pissaaq. Inuiaat nunatsinni anersaakkut nukimmik attassinissaat pisariaqarmat, kulturikkut suliaqartortatta eqeersaasutut illutik kinaassuserput siammarterpaat. Inuiannut allanut nunarsuarmioqatitsinnullu kulturitta imartoqisup, inuit assigiinngitsunik naleqartitaqartut ataatsimuulerfigalugu katersuuffigaat. Inuit Ataqatigiinniit qujarusuppugut, inuiattut kinaassuserput kulturerpullu aserfallatsaaliniarlugulusooq Inatsisartunut ilaasortaq Peter Olsen siunnersuuteqarmat.

Nunap inuisalu siuarsarnerat kinaassusilimmik naalackersuinikkut suliaasariaqarpoq. Kulturperput aamma tassuuna kinaassuserput, ukiumiit ukiumut kikkut naalackersuisuutitaqarnerat apeqqutaatillugu ingerlanani patajaatsuusariaqarpoq. Soqutiginarluinnartuuvoq eqqumiitsuliornikkut aningaasaateqarfimmik pilersitsinissaq siunertaralugu inatsisiliortut suliaqarnissaat anguniarneqarmat. Tamannami pisariaqarluinnartuuvoq ukiut tamaasa Inatsisartut Aningaasanut Inatsisaannik suliaqartarnitsinni uppernarsaatissaqartippaput.

Kialluunniit arajutsisimanngilaa ukiut tamaasa aningaasanut inatsisissaq sammineqaleraangat eqqumiitsuliortortavut nalornilersarmata. Tamatumani pissutaavoq ukiut tamaasa aningaasaliissutit atugassiissutaasartut sipaarniarneqassanersut, imaluunniit ingerlatiinnarneqassanersut nalornissutaasarmat. Allatut oqaatigalugu, eqaannerusumik naatsorsuutigineqarsinnaasumillu eqqumiitsuliortortavut periuseqarfigisariaqarpagut. Ullormiit ullormut, imaluunniit, ukiumiit ukiumut politikikkut sangujoraartuusineq

qimallugu Inatsisartut aningaasanut inatsisaanni aningaasaateqarfimmik pilersitsisariaqarpugut.

Inuit Ataqatigiit isumaqarpugut suliassaq nutaamik immeraassutigina Inatsisartut Aningaasanut Inatsisaanni erseqqilluinnartumik oqaasertalersugaasumik aningaasaateqarfiliortoqartariaqartoq. Eqqumiitsuliortortavut ingerlatsiniaraluarlutik allaffissornerup eqaqisup assut aporfilersortarai naluneqanngilaq. Tamanna pissusissamisuunngilaq. Iliuuseqarnissatsinnut piffissaq pitsaaqaaq. Massakkummi suli aningaasanut inatsit isumaqatiginninniutaallunilu allanngortinneqarsinnaammat atorluarniartigu.

Tamatta kissaatigaarput nunatsinni inuiattut eqqumiitsuliortortavut, isiginnaartitsisartuugunik, sanaluttartuugunik, nipilersortartuugunik, qalipaasuugunik il.il. aamma maani nunatsinni naleqartinneqarlutillu pitsaasunik atugassaqartinneqarnissaat.

Pissutsit eqqumiitsuliortut atugarisaannut attuumassuteqartut pitsanngortinneqassappata, aamma politikereerit aningaasaliissutinik atugasseereernerisa kingorna kulturilerisut suliniarnerminni Namminersorlutik Oqartussat allaffissornikkut pinialuusaartarnerannik sunnersimaneerutissappata, pisariaqarpoq EPI-mi atorfilittat piginnaasaqarluartut atorfinitsinneqarnissaannut aningaasaliissutit naapertuunnersut nalilersorneqarnissaat.

Inuit Ataqatigiit isumaqarpugut Naalakkersuisut akissuteqaamminni tunngavilersuutaat isumaqatiginartortaqartut. Taamaattorli aamma isumaqarpugut ukiup tulliani ajornartorsiutit uteqqissanngippata Naalakkersuisut kulturikkut eqqumiitsuliortortatta atugarisaat pillugit isumasioqatigineqarnissaat pissusissamisuussasoq.

Ilisimavarpummi Inuussutissarsiornermut Naalakkersuisoqarfiup aamma Kultureqarnermut Naalakkersuisoqarfiup ataatsimoorussaannik anguniagassat siornatigut suliarineqarnikuusut, ilaatigut takornarissanut kulturikkut misigisassianik eqqumiitsuliortuniillu aallaavilimmik inuussutissarsiutit inerisarneqarnissaannik siunertallit. Taamaammat isumaqarnaraluarpoq massakkut siunnersuuteqartup Peter Ohlsenip anguniagai ujartugaalu qangali Naalakkersuisuniit piviusunngortinneqareersimassagaluartut. Kisianni taamaanngilaq.

Naalakkersuisut akissuteqaamminni pissutsit iliuusissallu siunissami anguniarneqartussatut oqaatigineqartartut amerlavallaqaat maanngaannartartutut oqaatigineqarsinnaasut, naak ilaat soqutiginarlutillu pingaaruteqartaraluartut. Taamaammat Naalakkersuisup naggataarutaasumik akisassaanik apeqqutinik imaattunik Inuit Ataqatigiinniit apeqquteqassaagut:

1. Naalakkersuisut qanoq iliuuseqassappat EPI-mi 2019 januar aallarnerfigalugu atorfinitsitaq suliassanut aalajangersimasunut piginnaaneqartutut nalilerneqanngippat?

2. Naalakkersuisut qanoq iliuseqassappat, EPI aqputigalugu aningaasaliissutit atorpeqanngitsoorpata taamaalillutillu aningaasat atunngitsuukkat aalajangersakkat malillugit Kalaallit Airport-imut tunniutiinnarneqassanngippata?
3. Kulturikkut eqqumiitsuliortut peqatigalugit takornarissanut misigisassianik inuussutissarsiuteqarsinnaaneq Naalakkersuisut qanoq timitaliiffiginiarpaat?
4. Filmiliortut sullivissaanut aningaasaliissutit Naalakkersuisoqarfanni nalornissutaasut qanoq iliuseqarfiginiarneqarpat?
5. Nipilersugassianik CD aqputigalugu saqqummersitsisarnerup akilersinnaajunnaariartornera pissutigalugu nutarterinikkut internet aqputigalugu tunisassiulernissaq Naalakkersuisut qanoq anguniarniarpaat?
6. Isiginnaartitsisartut atuakkiortut il.il. siunissami aningaasalersuinikkut nalorninanngitsumik naatsorsuuteqarsinnaanerat qanoq Naalakkersuisuniit timitaliiffiginiarneqarpat?
7. EPI aningaasaliissutinik tamakkiisumik ingerlatsilissappat ullumikkut aporfiusut aaqinnissaat siunertaralugu Naalakkersuisut aaqqiissutissanik aallartitsereersimappat?

Inuit Ataqtigiit neriutigaarput Naalakkersuisut aamma inatsisartuni partiit tamattaalluta suleqatigiilluarnitsigut nunatsinni kulturikkut eqqumiitsuliortortatta atugaat siuarsaaffigalugit ineriartortitsinissaat periarfississinnaassagipput.

Taamatut oqaaseqarluta siunnersuut Inatsisartut Kultureqarnermut Ataatsimiititaliaanni suliarineqartussanngorlugu ingerlatinneqarnissaa inassutigaarput.